





Ursach. vnd antt-
 wortt. das iung-
 frawē. kloster. got-
 lich. vlassen mugē.

Doctor Martin⁹
 Lutter.
 Wittenberg.
 M.D. xxij.

L H



¶ Dem fürsichtigen vnd weyßten Leonhard Koppem
Burger zu Torgaw meynē besondern freun-
de Gnad vnd frid Martinus Lu-
ther.

Grad vñ frid yñ Christo. Es ist freylich als
so wie die schrift sagt/dz niemāt kan frun-
men odder schaden thun/er sey denn dazzu
verordenet von Gott/wie d̄ Prophet sagt/
4. Reg. 5. vō dem Naamā zu Syrien/das Gott durch
den selben gluck vnd heyl gab dem land Syriē / Wid-
derüb vom konige Pharaο schreybt Mose/das er nicht
aus seynem vernungē die kinder Israel bedrenget. Sō-
bern Got verstockt seyn hertz da er spricht zu yhm. Dar-
umb hab ich dich erweckt/das ich meyne macht an die
beweyße/auff das meyn name verkündigt werde ym
allen landen. Daher trozt auch Isaias. 41. alle gotlo-
sen vnd spricht/Troz vnd thut frumen odder schadē/
last sehen/was kundt yhr? Vnd Machab. 5. steht ge-
schrieben. Sie warē nicht des samēs der menner durch
wilche heyl vnd gluck Israel widderfure.

¶ Mocht yhr sagen. Wo will das hynaus? Dahyn
aus/das yhr eyn new werck gethan habt/dauon landt
vnd leuth singen vnd sagen werden/wilchs viel wer-
den fur grossen schaden aus schreyen. Aber die es mit
Gott hallten/werdens fur grossen sumē preysen/auff
das yhr gewissz seyt/das es Gott / also verordeneth
hatt/vnd nicht ewer eygens werck nach radt ist / vnd
gehen lasszet der ienigen geschrey/die es fur das aller
ergist werck thaddeln werden/vnd von Gott widder
verordenet noch befolhen achten. Pfw. Pfw. / werden
sie sagen/Der narr Leonhard Koppem hatt sich dem
verdampften keizrischen Monch lassen fangen vnd se-

ret tzu vnd furet Neun Nonnen auff eyn mal aus dem
Kloster/ vnd hilffte yhn yhr gelubd vnd klosterlich leben
tzu verleucken vnd tzu verlassen.

¶ Sie werdet yhr aber mal sagen/ Das ist warlich
heymlich gehalten vnd wol verporgen/ ia verrhaten/
vñ verkaufft/ das auff mich erhetzet werde das gantze
Kloster tzu Tymptzschē/ weyl sie nu horen/ das ich der
reuber gewesen byn. Antwortt ich / ia freylich eyn se-
liger reuber/ gleich wie Christus eyn reuber war yñ der
welt/ da er durch seynen todt dem fursten der welt/
seynen harnsch vnd haus geredt nam/ vnd furt yhn ge-
fangen/ also habt yhr auch diese armen seelen aus dem
gefengnis mēschlicher tyranny gefurt eben vmb die
rechten tzeyt auff die ostern/ da Christus auch der seyn-
nen gefengnis gefangen nam.

¶ Das ich aber solchs aus ruffe/ vnd nicht heymlich
halte/ thu ich aus redlichen vrsachen. Erstlich das es
nicht darüb ist durch mich angeregt/ dz es sollt heym-
lich bleyben/ denn was wyr thun/ das thun wir in gott
vnd schewen vns des nicht am liecht/ wollt Gott
ich kund auff solche odder andere weysse alle gefange-
ne gewissen erredtē/ vnd alle kloster ledig machē. Ich
wollt michs darnach nichts schewē tzu bekennē sampt
allen/ die dazu geholffen hetten/ trostlicher zuersicht
Christus der nu widder hatt seyn Euangelion an tagt
gebracht vñnd des Antechrists reich zustoeret/ wurde
hye schutz herr seyn/ obs auch das leben kosten muste.

¶ Zum andern thu ichs/ der armē kinder vñ yhrer
f. eundschaft: ehre tzu erhalten/ den wie hoch die blin-
den f. euel richter/ solchs auff erden fur ketzerey vnd ab-
trinnigkēyt schellten (wilchs seyn richter wol finden
wirt) so haben wyr doch das vorwaret/ das niemant
sagen thar/ sie seyen durch losse buben vnredlich ausge

firt/vñ yhrer ehre yntt fahr sich begebē. Die weyl man
euch vnd die ewrē kan anzeigen. Dazzu mus das yder
man lassen erbarlich gehādelt seyn/das sie nicht eynze
len/eyne hie hynaus / die andern da hynaus geloffen
sind/sondern allesampt beyeynander / mit aller zucht
vnd ehre/an redliche stett vnd ortte komen/da mit den
lester meulern die vsach genomen werde / yhr lugen
hassfuge zungen mit frumen kindern zu wasschen. Den
das sie solchs widder Gott vnd yhr gelubdt gethan
schellten/wollen wyr leyden vnd wagen.

¶ Czum dritten zu warnen die hern vom Adel/vñ
alle frume bidder leutte / so kinder yñ kloster habē/das
sie selbs dazzu thū/vñ sie erausser nemē/ auff das nicht
ergers hernach folge. Den wie wol viel des adels vnd
bidder leutte/der sachen von gotis gnaden verstendig
yhre kinder odder freundyn wol gern eraus hetten/
vnd doch das exempel schewen/die ersten ban tzu bro
chen. Tu aber sie sehen/das so viel erbarer kinder/ mit
verwarter zucht vñ ehre/die ban gebrohe haben / vnd
des bekentlich sind/werde sie mutiger vnd thurstiger
werden. Werden aber ettliche zorniger/das mus man
lassen geschēhē/vñ sich nicht verwūdern. Den sie den
cken es sey vnrecht/nach dem sie bissher versurt / nicht
anders geleret sind/ Es wirt mit der zeyt besser werde
¶ Dz sey meyn entschuldigūge gegē euch d̄s funde halbe
dz ich solchs ewer werck v̄ratē/vñ off̄nbar habe Auff
dz ich aber auch vnser aller wort rede/ beyde meyns d̄
sichs geratē vñ gebetē/vñ ewer mit den ewern die yhrs
aus gericht/vñ der iungfrawen/die der erlosunge be
darfft habē. Will ich hie mit kurtzlich fur Gott vñ aller
welt rechen schaffe vnd antwort geben/wie wol ichs
sonst yñ andern buchlin reichlich gethan habe/das al
le Christliche hertzen merckē sollē/wie wyr nicht das
vnserē/sondern zuvor gottis ehre vñ des nehiste bestes

gesucht habe. Aber den unchristlichen hertzen wolle wir
ihren synn lassen/bis sie es bas verstehen.

¶ Auff's erst/das die kind zuvorn selbs yhr Eldern
vñ freundschaft auff's aller demutigst ersucht vñ geber-
ten habe/ vmb hulff eraus zu komē/ mit vernünftigen
grugsamē vrsachē angetzeygt/das yhenen solch leben/
der seelē selickēyt halbē/nicht lenger zu duldē sey/ sich
danebē erbottē zu thun/vñ zu leyden/was frum kinder
thun vñ leydē sollē. Wils yhn alles abgeschlagen vñ
versagt ist/vñ also von yderman verlassen sind/da mit
sie recht vñ redlich vrsach gehabt/ia genottiget vñ ge-
dungen sind/yhr gewissen vñ seele zu erredtē/anders-
wo wie sie haben kundē/hulff vñ radt suchen. Vñ dye
ihenigē so hie habe künden/helffen vñ radten/schuldig
gewessen sind/aus Christlicher liebe pflicht/die seele
vnd gewissen zu erredten.

¶ Zum andern ist das eyn hohe wichtige vrsach
vñ nott/das man leyder die kind/sondlich das schwa-
che weyber volck vñ iunge megde yn die klöster stößet
reyzt vñ gehē lest/da doch keyn teglich vbung ist got-
lichs wortts/ia sellten odder nymer mehr das Euāge-
lion eyn mal recht gehoret wirt. Vñ werdē doch ym
den hohisten kampff gestellet. Nemlich vmb die iung-
frawschafft zu streyttē/da kannt vñ gar selte auch die
ihenigē bestehē/die mit gottis wort allēthalbē gerust
vñ mit hoher selzamer wunderbarlicher gnad erhaben
sind. Es darff muhe/die ehliche kenscheyt zuhalten/
auch mit beyständt gotlichs wortts/vñ dis iunge torich-
te vnerfarne weyber volck/wirt dahyn gestossen da 8
streyt am herttē vñ mechtigisten ist. O der unbarm-
hertzigē eldern vñ freundē/die mit den yhrē so grew-
lich vñ schrecklich faren/O der blindē vñ tollē Bis-
choff vnd Epte die hie nicht sehē noch fulē/was dye
armen seelen leyden/vnd wie sie verderben.

¶ Diese vrsach das man Gottis wort mägeln mus/
ist alleyne gnug/ ob sonst keyn andere were/ vns alle zu
entschuldigē/ ia zu loben vnd zu preysen für Gott vñ
der welt/ das man aus kloster lauffen/ helfen vnd
ratten soll/ das die seelen eraus geryssen/ gefürt/ gesto-
len vnd geraubt werden/ wie man kan/ vnangesehen/
ob tausent eyd vnd gelubd geschehen weren/ Den wiss-
sentlich ist/ das ym kloster/ sondlich nonnē kloster
Gottis wort teglich nicht gehet/ vnd am meysten ortte
nymer mehr/ sondern sich nur blewen vnd treyben mit
menschen gesezen vnd wercken. So ist widderumb
gewiss/ das man on gottis wort teglich für gott nicht
leben kan. Vnd keyn gelubt für Gott gellten odd haltē
kan/ da mit man sich an den ortt verbindet/ da keyn got-
tis wortt gehet/ vnd den ortt lest da gottis wortt gehet/
Den es ist solchs gelubd eben so viel/ als got verleugnē
weyl wyr alle zu gottis wortt verpunden sind.

¶ Auff's dritte/ ist das kundlich vnd offinbar/ das
eyn mensch mag wol gezwungen werden für der welle
zu thun/ das er nicht gerne thut. Aber für Gott/ vñ yñ
Gottis dienst/ soll vnd kan keyn werck noch dienst ge-
zwungen vnd vngerne geschehen/ Denn Gotte gefal-
len nicht vnd will auch nicht haben gezwungene vn-
willige dienste. Wie. S. Paulus. 2. Corin. 9. sagt. Gott
hatt lieb ein frolichen geber/ on zweyffel ist er widder-
umb feynd eyn vnfrolichen vnwilligen geber. Daher
auch. S. Paulus die edle iungfrawschafft nicht haben
will/ wo sie ertzwingen vñ vnwillig geschicht. 1. Cori.
7. Solche froliche lust aber zu gottis dienst gibt widt
kloster noch kapppen/ widder gelubd noch werck/ son-
dern alleyn der heylige geyst.

¶ Wie viel meynst/ aber das Nonnen ym kloster
sind/ da das teglich gottis wort nicht gehet/ die frolich

vñ mit lust vngewungen yhren gottes dienst thun vñ
orden tragen? freylich vnter thausent kaum eyne.
Was ist's denn das du solchs kind lessist also seyn lebē
vnd alle seyne werck verlieren/ vnd dazu die helle da
mit verdienen? Were es nicht besser/ wenn sie ia etwas
vngerne/ vnd mit vnlust thun soll/ sie were ehlich/ vnd
thet solche muhe/ vnd vnlust yhm ehlichen standt eu-
serlich gegen die menschen/ als yhr man/ kind/ gesinde
vnd nachbar zc. Weyl denn Gott keyn dienst gefelt/
es gehe denn willig von hertzen vñ mit lust. So folget
das auch keyn gelubd weytter gellten noch geschehen
noch gehalten werden soll/ denn so fern die lieb vñ lust
da ist/ das ist/ so fern der heylige geist da ist. Darumb/
in solch gelubd/ on lust vnd geist geschicht/ achtets got
nicht vnd nympts nicht an. Das also /dis auch eyn
gnugsame ursach ist/ gelubd vnd kloster zu lassen vnd
yderman eraus zu helfen ynn eynen andern standt.

¶ Zuffs vierde / Wie wol man sich dyser ursach
schier schemen mus/ so ist's doch fast der grossistē eyne/
kloster vnd kappen zu lassen / Nemlich / das vnmug-
lich ist/ die gabe der keuscheyt so gemeyne sey / als die
kloster sind / Denn eyn weybs bild ist nicht geschaffen
ungfraw zu seyn/ sondern kinder zu tragen/ wie Gen.
1. Gott sprach nicht alleynē zu Adam/ sondern auch zu
Zena/ seyt fruchtbar vnd mehret euch / wie das auch
die leyplichen gelidmas weyblichs leybs/ von Gott da
zu eyngesetzt beweyssen. Vnd solchs ist nicht zu eynē
weyb/ noch zu zweyen/ sondern zu allen gesagt/ vnd
keyne aufgeschlossen. Got zibe sie den selber aus/ nicht
durch vnser gelubd odder freyen willē/ sondern durch
seyner eygen radt vnd willen mechtiglich / wo er das
nicht thut/ soll ein weybs bild/ ein weyb bleybē frucht
tragen/ dazu es gott geschaffen hat / vnd nicht besser

machen denn ers gemacht hatt.

¶ Itē da er heu verfluchte/nam er yhr nicht dem weyplichen leyb/noch weybische gelidmas. Widder rieff auch nicht seynem gesprochen seggen vber sie/das sie sollt fruchtbar seyn/sondern bestettigt den selbē vñ spricht/Ich will dyr viel muhe schaffen/wē du schwāger gehest/dyße plage ist auch nicht vber eyns odder zwey weyber gesagt/sondern vber alle/das die wortt lauttē/als sey got gewissz/das alle weyber werden schwanger seyn/vnd sollen diße plage tragen/on wilche er selbs aus nympt. Da widder kan yhe keyn gelubt noch bund gelten noch hallten/Den es ist gottis wort vnd gemechte.

¶ Hie thun sie denn zwo eynrede/Die erst/Man solle die gelubd hallten/Das ist warlich war/wen du gottlich gelobist/das deyn ist/vnd ym deynen macht steht. Ich horet hie zu/eyn gelerten man eyn mal sagē/Meyn mütter hatt gelobt. Ich sollt eyn bischoff werde Wie soll ichs hallten? Deyn ist aber nicht iungfraw seyn/widder eyngeetzte natur/Sondern wie. S. Paulus sagt. 1. Corin. 7. Es ist eyn gottis gabe/Wie ich nu keyn Gottis gabe kan gelobē/so kan ich auch keuscheyt nicht geloben. Es mus alles zumor meyn seyn/ehe ichs gelobe. Wie auch Samuels mütter yhrē son Got gelobet/wd er yhr den selbē zumor gebē wurde 1. Reg. 1. Also sollt man auch keuscheyt geloben/so fern sie Gott gebē wurde/wo nichts/das das gelubde nicht were.

¶ Lesen wyr doch auch. 1. Reg. 14. das Saul auch gelobt zwey mal mit eyn eyde/das niemant des tags essen solle/vnd auch seynen son zu todtenn/Democh must ers lassen/vnd Gott weret es yhm/durchs volck vnd seynen son. Da mit yhe Gott gnugsam beweyset hatt/das vnchustliche/vnd s. hedliche gelubd nichts zu hallten

zu halltē sind / ob sie gleich auch mir dem lebē schaden
viel mehr wirtt er die gelubd verdamnen / die der see-
len schaden vnd verderben sind. Vnd ist dis exempel
woll zu mercken / das nicht genug ist gesagt / ia ich hab
gelobt / ich mus halltē / lieber / sihe zuuor / obs muglich
vnd gotlich ist / was du gelobest / sonst wenn vnmug-
lich gelubd gulde / mochtestu woll geloben / eyn mutter
gottis werden wie Maria.

¶ So sprechen sie aber mal / obs gleich vnmuglich
sey / so kan mans mit beten erlangen / wie. S. Hierony.
leret. Antwort / auff's erst. Got gebe myr nur nicht viel
der keuscheyt. S. Hieronymi / wilcher selbs bekēnet / dz
er seyns fleyschs wueten vnd brunst mit keyner fasten
noch muhe zemen kund / Wie vil besser were yhm ge-
weße / nach. S. Paulus rad ? freyen / denn also brennen
Vñ ist hyryn sein exempel nicht gutt nach zu folgē. Denn
keuscheyt hat wol anfechtūg / aber solch tegliche brūst
vñ wuete ist eyn gewisß zeichē / das Gott nicht gege-
ben hatt noch geben will die edle gabe der keuscheyt /
die da mit willen on nott gehalten werde.

¶ Auff's and / man kan freylich alles von Got erlan-
gen mit betē. Er will aber auch vniuersucht seyn. Chri-
stus hette sich wol kundē von der zynnen des tempels
ernydd lassen / wie der teuffel furgab / Er wollts aber
nicht thun / weyl es nicht nott war / vnd wol auff and
weyße kund erab kōmen. Ich kund auch wol mit beten
erlangen / das ich nicht esse noch truncke was auff erdē
wuchße / Weyl aber das nicht nott ist / vnd Gott myr
sonst so viel geben hat / das ich essen soll vnd kan / soll
ich yhn nicht versuchen / das lassen liegen / das er gege-
ben hatt / vnd eyn anders on nott gewarrten / das er
nicht gegeben hatt / denn da were Gott versucht.

¶ Also auch hie / weyl er man vnd weyb hat geschaf-

B

fen/ das sie zu samen sollen/ soll ich myr nicht für nemen
eyn andern stand/ vnd ihenen liegen lassen / aus eyge-
nem furwitz vnd mutwillen/ Den da mit gebe ich mich
on nott vnd vsach ynn ferlickeyt/ vnd versuche Gott/
syntemal wol eyn and gottlich stand da ist/ da ich der
ferlickheit vñ versuchung nicht bedarff. Den wer dringet
mich odd berufft/ dz ich on ehe bleybe? Was ist mir die
iungfrawschafft vñ nottē/ weyl ich fule das ich sie nicht
habe/ vñ Gott mich sonderlich nicht dazu berufft/ vñ
weyß doch/ das er mich zur ehe geschaffen hatt? Dar-
umb willst du etwas bittē von Gott/ so bitt das dir nott
ist/ vñ da dich die nott zu dringet. Ist dirs aber nicht
nott/ so versuchstu yhn gewislich mit deynem gepett/
Den seyn name heyst Adiutor in oportunitatibus in tri-
bulatione. Nothelffer Psalm. 10. Nemlich das er hilffte
mir da alleyne/ da sonst keyn hulff vñ mittel durch yhn
zuuor geschaffen ist.

¶ Die ander eynrede ist / das es ergerlich sey / wid-
den gemeynen allten brauch vnd lere/ vnd der schwach-
chen gewissen sey zu schonen. Antwort/ Ergernis hyn
Ergernis her. Not bicht eyßen/ vnd hatt keyn ergernis.
Ich soll der schwachen gewissen schonen / so fern
es on fahr meynen seelen geschehen magt. Wo nicht/ so
soll ich meynen seelen radtē/ es erger sich dran die ganz-
ze odder halbe wellt/ Tu ligt hie der seelen fahr ynn
allen stücken/ darumb soll niemāt von vns begerē/ das
wyr yhn nicht ergern. Sondern wyr sollen begern/ das
sie vnser ding billichen vnd sich nicht ergern/ das fod-
dert die liebe.

¶ Das will ich auff dis mall meyn gutter freünd kurz-
lich zur verantwörtung gegeben haben/ für euch / für
mich/ vnd für dise iungfrawē/ auch für alle / die disem
exempel wollen nach folgē/ byn auch gewisß/ das wyr:

damit für Gott vnd der welle vnueradbelich besten
hen wollen. Aber den widersachern vnd verstock-
ten kopffen/den Gott selber nicht kan gnug thun/wol-
len auch wyr vns nicht vermessen gnug zu thun/son-
dern sie lassen toben vnd lesten/bis sie es mude wer-
den. Wyr haben eynen richter vber vns der wirt recht
richten.

¶ Ich will aber auch die iüngfrawē hie nennē/auff
das alles ia frey am tage sey/Vnd sind nemlich dyße/
Magdalena Staupitzyn/Elisabeth Canitzyn. Dronis-
ca Zeschaw/Margaretha Zeschaw yhr Schwester/
Laneta vō Solis/Aue Grossyn/Katherina von Bo-
re/Aue von Schonfelt/Margaretha von Schonfelt
yhr Schwester. Der almechtig Gott wolle gnedigli-
chen erleuchten alle freunde der ihenygē so mit sar vnd
vnlust ynn klöstern sind/das sie yhn trewlich eraus-
helffen/Wilche aber geyst verstendig sind/vnd klöste-
rey nutzlich wissen zu brauchē/vnd gerne drynnē sind/
die lassz man bleyben ym namen Gottis.

¶ Hie mit befehl ich euch Gott/vnd grust mir ewer
liebe Audi vnd alle freunde ynn Christo/Gegeben zu
Wittemberg am Freytag ynn der osterwoche. Anno.

1. 5. 2. 3.

B ij

Faint, illegible text, likely bleed-through from the reverse side of the page. The text is arranged in several lines and appears to be a list or a series of entries, possibly related to a historical record or a collection of items. The characters are difficult to decipher due to the fading and the age of the paper.



No 4147



4


TA-70C

Nur A. Steu bisher aufgenommen
bzw.
noch nichts
Verknüpft

revisiert 1954
+ getrieben d.R.







B.I.G.

Farbkarte #13

Blue Cyan Green Yellow Red Magenta White 3/Color Black



Ursach . vnd antt-
wortt . das iung-
frawē . kloster . got-
lich . vlassen mugē .

Doctor Martin⁹
Lutther .
Wittemberg .
M.D. xxij .

L H

